

UPM, UM bantu Orang Asli

Penganjuran program ini dapat mengeratkan hubungan antara mahasiswa dan masyarakat Orang Asli melalui aktiviti kemasyarakatan

PUSAT Kesihatan Universiti (PKU), Universiti Putra Malaysia (UPM) dengan kerjasama Jabatan Psikologi Pendidikan dan Kaunseling, Fakulti Pendidikan, Universiti Malaya (UM) menganjurkan program bersama masyarakat Orang Asli Kampung Sungai Bumbun, Pulau Carey, Hulu Langat, Selangor baru-baru ini.

Timbalan Naib Canselor (Jaringan Industri dan Masyarakat) UPM, Prof. Dr. Ing Ir. Renuganth Varatharajoo berkata, program itu merupakan platform untuk mengenal pasti masalah dalam membantu pembangunan taraf kesihatan dan kehidupan Orang Asli.

"UPM terbuka untuk bekerjasama dalam pembangunan Orang Asli dan sedang membantu reka bentuk rumah khas yang sesuai untuk didiami oleh golongan ini hasil usaha sama Fakulti Kejuruteraan dan Fakulti Rekabentuk dan Senibina, UPM," katanya.

Tambah beliau, penglibatan aktiviti bersama Orang Asli bukan sahaja di Selangor, malah di negeri-negeri lain iaitu antaranya Pahang, Perak, Johor, Sabah dan Sarawak.

"Masyarakat Orang Asli merupakan salah satu fokus yang diberi keutamaan dalam aktiviti pembangunan masyarakat di UPM dan kami bersedia bersama masyarakat Orang Asli dengan adanya



RENUGANTH Varatharajoo (tengah) bersama sebahagian peserta program bersama masyarakat Orang Asli Kampung Sungai Bumbun, Pulau Carey, Hulu Langat, Selangor, baru-baru ini.

modul-modul latihan dan pembangunan," katanya.

Ketua program, Dr. Ahmad Kamarul Juperi berkata, kesihatan dan pendidikan merupakan dua elemen utama bagi melahirkan masyarakat yang sihat dalam

mewujudkan sebuah negara yang maju di masa akan datang.

"Dengan pelaksanaan program ini diharapkan dapat memastikan masyarakat Orang Asli di perkampungan tersebut mendapat peluang pemeriksaan kesihatan

dan pergigian secara percuma serta mempunyai perpustakaan mini yang lengkap dengan bahan bacaan dalam menanam minat membaca di kalangan masyarakat Orang Asli," katanya.

Beliau berkata, dengan penganjuran program sebegini dapat memperkuuh hubungan antara institusi pengajian tinggi dan masyarakat Orang Asli melalui aktiviti kemasyarakatan.

Sementara itu, Pelajar Ijazah Sarjana Muda Sains Dietetik UPM, Nurlyana Bukhari berkata, program kemasyarakatan ini diharapkan diadakan pada masa depan bagi meningkatkan pengalaman di kalangan masyarakat Orang Asli.

"Saya mendapat dari aspek pemakanan masyarakat Orang Asli kurang mengambil makanan berprotein. Makanan berprotein penting dalam membekalkan nutrien serta mengurangkan risiko penyakit kronik," katanya.

Rakannya, Lu Zheng Yi pula berkata, program ini merupakan pengalaman pertama dia mengikuti aktiviti sebegini dan berharap program seperti ini akan diadakan sebagai program tahunan.

"Ini adalah pendedahan yang baik dan saya dapat mengaplikasikan ilmu yang ada untuk membantu masyarakat orang asli terutamanya dalam pemakanan seimbang," katanya.